

Adina daplis mangiabains

San Murezzan: il 23. Gourmet Festival è a fin

DA GION NUTEGN STGIER / ANR

■ **Radund 4500 personas, fin oz il record absolut, han durant in'emna be mangià e bavi il meglia dal meglia. Il Gourmet Festival a la fin da schaner attira adina daplis novs mangiabains. A fin è l'occorrenza ida cun ina tschaina da gala nua che be «VIP'S» èn stads da la partida.** Nagina crisa economica tar ils visitaders dal Gourmet Festival 2016 en l'Engiadina'Ota. Da tuts tschintg continents da quest mund èn vegnids ils gourmets en rotscha a San Murezzan per giudair las tratgas finas dals nov cuschiniers internaziunals. Durant in'emna han gi lieu bunamain 40 occorrenzas culinaricas superlativas. Ultra da quai han ils cuschiniers giapunais da num e pum envidà mintga saira participantas e participants dal festival ad uschenumnads Gourmet Dinners en ils hotels da luxus. Per ils mangiabains ina vaira aventura, han els pudì mintga di examinar autras

tratgas finas, senza viagià tras l'entira Europa, ils Stadis Unids da l'America u il Giapun. Las personas cun buccas e nas fins han lura er constatà ch'ils cuschiniers fan gugent experiments, èn innovativs e cumbineschan spaisas tradiziunalas cun novas tratgas d'emprima classa. Ils cuschiniers dal Giapun han testifigà che tar els vegn betg mo «Sushi» sin il plat, mabain anc bleras autras spaisas finas.

Cuschina giapunaisa e la «Haut Cuisine» franzosa

Ina vaira aventura èn stadas las «Gourmet Safaris» nua ch'ils mangiabains èn vegnids pupragnads culinaric dals stars cuschiniers e quai en cuschina. Suentar mintga plat han ils gourmets midà lieu e cuschina e vegnids manads cun autos da luxus en il proxim hotel per cuntinuar l'aventura culinarica. Cun ils cuschiniers da renum internaziunal han lura ils mangiabains pudì star a maisa, sagiar e



La saira finala ha gi lieu en la sala da l'hotel Kulm a San Murezzan.

FOTOS A. METTLER



L'emna culinarica cun ils cuschiniers giapunais è stada in vair success.

gustar las piculezzas finas e da bun gust. S'unida è tar la 23avla ediziun dal Gourmet Festival la cuschina giapunaisa cun quella da l'America latina, cun la «Haut Cuisine» franzosa e la cuschina mediterranea. In absolut punct culminant da l'emna culinarica è stada la «Kitchen Party» en la chadafieu da l'hotel Palace a San Murezzan. Tar quel event culinaric han ils mangiabains giudà las creaziuns singularas dals nov cuschiniers d'emprima classa e lura er vins e schampagn da buna qualitat. A fin è l'occorrenza ida cun la tschaina da gala en l'hotel Kulm nua che cuschiniers ed organisateurs han

miss cun quel banchet da gala la curuna sin l'emna culinarica.

Il 2016 ina ediziun cun cuschiniers dals Stadis Unids da l'America

Reto Mathis, il president da las occorrenzas dal Gourmet Festival, è fitg cuntent cun l'ediziun da quest onn. Cun in total da 4500 gourmets ha l'occorrenza sveglià il pli grond interess dapi l'introducziun dal Gourmet Festival avant 23 onns. El è persvas che l'occorrenza a San Murezzan e contut tutga sin il mund tar quels Gourmet Festivals cun il pli grond resun. Reto Mathis è dal reminent sez in cuschi-

nier d'emprima classa ed el maina dapi 20 onns cun success plis restaurants da luxus a la Corviglia. L'Engiadinais è er quel cun ils buns contacts tar ils cuschiniers da renum internaziunal e la persuna che gira en l'entir mund per scuvrir tempels per mangiabains. Da quels ha Reto Mathis er chattà en ils Stadis Unids da l'America, il pajais dals cuschiniers che vegnan ad esser il 2017 da la partida tar la 24avla ediziun dal Gourmet Festival en l'Engiadina'Ota. Gia ussa pon ils mangiabains sa legrar din'emna cun tratgas singularas e cun steaks en variaziuns americanas.